

հետո միայն կարող էր հայտնվել Վրաստանում: Իսկ դա կարող էր տեղի ունենալ նաև 1724—1725 թթ. Դավիթ-բեկի հետ ունեցած այն ընդհարումների ժամանակ, որոնց ընթացքում եղան ղեպքեր, երբ սուլթանը, ջախջախիչ պարտություն կրելով, հազիվ կարողացավ ամեն ինչ թողած ճողոպրել: Անհավանական չէ նաև, որ հրովարտակը տանողները ճամփին գերված լինեն Դավիթ-բեկի մարդկանց կողմից, որոնք վերցնելով նրանցից հրովարտակը, ուղարկած լինեն Վախթանգին ի գիտություն:

Այս բոլորն անշուշտ սոսկ ենթադրություններ են, քանի որ մինչև սույն հրովարտակի հայտնաբերումը, Ֆաթհ-Ալի սուլթանի մասին մեր տեղեկությունները հիմնականում սահմանափակվում էին «Պատմության» և Եսայի Հասան-Ջալալյանի տվյալներով, որոնց հիման վրա Ս. Արամյանը իր ուսումնասիրության մեջ խոսելով 1722 թ. լեզգիների արշավանքի մասին գրում է. «Պարսիկ ջարխաշի խանը, գլուխ անցած մեծ բանակի մը՝ լեզգիներու դեմ կելլեր. բանակ ղեկելով Պարկուշատ զավառի մեջեն անցնող Արաքս գետի եզերքը»¹⁷: Պարզ է, որ խոսքը շարխաշի բաշի Ֆաթհ-Ալի սուլթանի մասին է, որը, ինչպես նույն տեղում կարգում ենք, խուսափում է լեզգիների հետ ընդհարվելուց և հեռանում¹⁸: Հրովարտակում նրան տրված «շարխաշիբաշի» տիտղոսը կասկած չի թողնում, որ լեզգիների դեմ ելնողն ու ապա փախչողը նույն ինքն է՝ «Պատմության» մեջ բազմիցս հիշվող Բարգուշատի Ֆաթհ-Ալի սուլթանն է եղել:

Մեջ բերված հրովարտակի բովանդակությունից պարզ երևում է, որ նախապես արդեն շարխաշիբաշու զինվորական պաշտոն զբաղեցնող Ֆաթհ-Ալի սուլթանը որոշակի հանձնարարություն է ստացած եղել՝ իր հրամանատարության տակ եղած զորքերին միացնելով նաև տեղի մահմեդականներից հավաքված աշխարհագորականների ջոկատներն (իլչարի) ու Զիվանշիր և Քաբիրու ցեղերի զինված ուժերը, հարձակման անցնել ճնշելու Ղափանի հայոց ապստամբությունը: Շեշտված է հատկապես, որ «հայերի և մյուս հակառակորդների սաստումը նրանից է պահանջվում» և որ «հայերին սաստելու գործում նրան ազատություն է տրված»:

«Պատմությունից» մեզ արդեն հայտնի է, թե ինչ ընթացք ունեցան կողմերի միջև բորբոքված արյունահեղ կռիվները: Բացի խոտանանի կռիվից և հատկապես Բարգուշատում տեղի ունեցած մեկ ընդհարումից, որտեղ մելիք Ֆրանգուլի զավաճանության հետևանքով Թորոս իշխանի հրամանատարությամբ կռվող հայոց զորքերը ծուղակի մեջ ընկնելով պարտություն կրեցին, մնացյալ բոլոր ընդհարումներում վերջնական հաղթանակը միշտ էլ հայոց կողմն է եղել:

Սակայն, եթե 1724 թ., ինչպես այդ երևում է նաև հրովարտակի բովանդակությունից, շահը հրահանգում էր միավորել ուժերը ոչնչացնելու «հայերին, անարգ օսմանցիներին ու քրդերին», ապա երկու տարի անց արդեն, երբ օսմանյան ոպգմակալման հետևանքով կռվող կողմերի հարաբերություններում լուրջ տեղաշարժեր էին կատարվել, նա կարգադրում էր իր հավատարիմ խաներին՝ օգնության հասնել Դավիթ-բեկին, որը միայնակ կռիվ էր մղում Բեքիր և Արաբ-Ալի փաշաների, նրանց միացած նույն Ֆաթհ-Ալի սուլթանի և օսմանցիներին հնազանդություն հայտնած այլ ուժերի դեմ:

Վ. Ոսկանյանն ու Վ. Դիրլոյանը, XVIII դարի 20-ական թթ. Անդրկովկասում Ռուսաստանի քաղաքականությանը վերաբերող այլ արժեքավոր վավերագրերի շարքին, 1964 թ. հրատարակեցին նաև Ռուսաստանի արտաքին քաղաքականության արխիվում պահվող շահ Քահամասպ II-ի հիշք. 1139 թ. ջումադի I ամսին (1727 թ. հունվար) տրված մի հրովարտակի ուսերեն թարգմանությունը, որով շահը կարգադրում է Մուհամադ-Ռիզա խան Աբգալուին շտապ օգնության հասնել Դավիթ-բեկին, որ «իրազրուության փոփոխությունների հե-

¹⁷ Պատմություն Ղափանցոց. Առաջարան, էջ 29: Հմմտ. Եսայի Հասան-Ջալալյան. Պատմություն Աղուանից. Շուշի, 1839, էջ 44:

¹⁸ Նույն տեղում: